



CONVENIO ENTRE A XUNTA REITORA DO CONSORCIO UNIVERSITARIO DO CENTRO ASOCIADO Á UNED EN PONTEVEDRA E O EXCMO. CONCELLO DE VIGO PARA O MANTEMENTO DA AULA UNIVERSITARIA EXISTENTE EN VIGO

Aprobado pola Xunta de Goberno Local na súa sesión de data 30 de xuño de 2022.

En Vigo, na data da sinatura dixital.

INTERVEÑEN

Dunha parte, a Excm. Sra. Dna. María Carmen Silva Rego, presidenta da Deputación de Pontevedra, na súa calidade de presidenta da Xunta Reitora do Consorcio Universitario do Centro Asociado á UNED en Pontevedra, ente titular do citado Centro Asociado á UNED, como representante do dito Consorcio de conformidade coas previsións do artigo 14.a) dos seus vixentes Estatutos.

E, doutra parte, o Excmo. Sr. D. Abel Caballero Álvarez, na súa calidade de alcalde-presidente do Concello de Vigo e como legal representante deste, de conformidade co establecido nos artigos 21.1.b) e 124.4.a) da Lei 7/1985, de 2 de abril, reguladora das bases do réxime local, así como coo establecido no artigo 61.1.a) da Lei de Galicia 5/1997, de 22 de xullo, reguladora da administración local de Galicia.

EXPOÑEN

I.- Que o Convenio de creación da Aula de Vigo da UNED asinado o 8 de novembro de 2012 entre a Xunta Reitora do Centro Asociado de Pontevedra e o Concello de Vigo, necesita ser reformulado e actualizado para incluír no seu texto as condicións que durante estes anos foron regulamentando a vida académica e organizativa do Centro, sendo este criterio aceptado por ambas as dúas partes. A renovación do Convenio supón adaptarse ás previsións da lexislación vixente, que veu modificar tanto as competencias municipais como no propio réxime dos convenios interadministrativos.

II.- Que esta Aula Universitaria de Vigo (en adianta "a Aula") é parte integrante do Centro Asociado á UNED en Pontevedra, creado por Orde Ministerial de data 27 de febreiro de 1973, para atender o Ensino Universitario a Distancia de todas aquelas persoas residentes na súa zona de influencia.

III.- Que para facilitar o acceso ao ensino universitario e á continuidade dos seus estudos a todas as persoas que desexen seguir estudos superiores que elixan o sistema educativo da UNED pola súa metodoloxía ou ben por razóns laborais, económicas, de residencia ou calquera outra e demais fins da UNED, créanse os Centros Asociados como unidades da estrutura académica da UNED que desenvolvan territorialmente as actividades propias da Universidade e contribúen ao progreso sociocultural do contorno onde se sitúan. O Centro Asociado ten personalidade xurídico-pública propia como consorcio universitario integrante do Sector Público Institucional Estatal a través da UNED, ao que está adscrito.

IV.- Que o Concello de Vigo manifesta a súa vontade e interese en subscribir un novo Convenio para dar continuidade nesta localidade á Aula de Vigo do Centro Asociado á UNED de Pontevedra, vontade e interese que se articula de acordo coas estipulacións que a continuación se inclúen e que supoñen que a referida Aula sexa financiada polo Concello de Vigo como órgano de goberno e administración da localidade onde está situada.

V.- Que o Concello de Vigo estima que radicar no seu termo municipal unha Aula da UNED contribúe sobremaneira a satisfacer as necesidades e aspiracións da comunidade veciñal conforme ao establecido no artigo 25 da Lei 7/1985, de 2 de abril, reguladora das bases do réxime local.

VI.- Que ambas as partes se recoñecen capacidade e competencia suficiente e adecuada para subscribir o presente Convenio para o funcionamento da Aula de Vigo baixo as condición que recollen no corpo do Convenio que se subscribe.

En consideración do anteriormente exposto ambas as partes

ACORDAN

Que a Aula na localidade de Vigo é dependente do Centro Asociado á UNED en Pontevedra, de acordo coas seguintes

ESTIPULACIÓNS

PRIMEIRA. NATURALEZA E OBXECTO DO CONVENIO.

O Presente Convenio encádrase nos convenios interadministrativos previstos no art. 47.2 a) da Lei 40/2015 de 1 de outubro, de réxime xurídico do sector público, e ten por obxecto a colaboración entre o Excmo. Concello de Vigo e o Consorcio Universitario do Centro Asociado á UNED en Pontevedra (en adiante "o Centro Asociado") para o mantemento da Aula da UNED en Vigo, que foi creada, previas as autorizacións regulamentarias correspondentes por parte da UNED, mediante o Convenio de 8 de novembro de 2012 entre ambas as partes ao que este substitúe.

A Aula será parte integrante do Centro Asociado á UNED en Pontevedra, a cuxa normativa legal, administrativa e académica deberá suxeitarse no exercicio das súas actividades.

A Aula Universitaria ten as seguintes funcións:

1.1. FUNCIÓN DOCENTE.

Titorizar, na medida do posible, os ensinos indicados na estipulación terceira, punto 3.2.1.

As titorías impartidas terán o soporte e o formato que determine a UNED nas súas distintas modalidades e mediante as ferramentas docentes baseadas nas Tecnoloxías da Información e da Comunicación (TIC).

Igualmente, dependendo da demanda e das posibilidades do Centro, se poderá impartir outros estudos e actividades, acordes con plan académico docente do Centro Asociado á UNED en Pontevedra.

1.2. FUNCIÓN ORIENTADORA.

Facilitar ao estudante orientación personalizada antes de iniciar os seus estudos na UNED, ao longo dos seus estudos no que se refire a aspectos académicos, de aprendizaxe e de desenvolvemento profesional, así como cando se converta en egresado.

1.3. FUNCIÓN DE EXTENSIÓN UNIVERSITARIA E CULTURAL.

Desenvolver, na medida do posible, un programa de extensión universitaria para a poboación con cursos de formación e de divulgación científica e cultural adecuados á demanda territorial e social.

1.4. FUNCIÓNS ADMINISTRATIVAS.

Facilitar, na medida do posible, a matrícula do alumno ou outras actividades administrativas, en función da demanda e da planificación realizada polo Centro Asociado.

SEGUNDA. COMPETENCIA PARA A SINATURA DO PRESENTE CONVENIO.

O Consorcio Universitario do Centro Asociado á UNED en Pontevedra subscribe o presente Convenio no exercicio das competencias que lle son propias.

O Concello de Vigo é competente para a sinatura do presente convenio por canto o mesmo dá continuidade á prestación dos servizos xa establecidos en virtude do convenio de 8 de novembro de 2012 e adenda ao mesmo de 22 de xullo de 2014, polo que non supón o exercicio de novas competencias, de conformidade co disposto no artigo 3.3 da Lei 5/2014, de 27 de maio, de medidas urxentes derivadas da entrada en vigor da Lei 27/2013, de 27 de decembro, de racionalización de la Administración local.

TERCEIRA. OBRIGAS DAS PARTES.

3.1. OBRIGAS DO CONCELLO DE VIGO.

Con carácter xeral, o Concello de Vigo farase cargo da totalidade de gastos que orixine a Aula, xa sexa directamente ou compensando ao Centro Asociado o custo por el incorrido, nos termos seguintes:

3.1.1. Facilitar un inmovible onde situar a Aula da UNED en Vigo.

A Aula atópase actualmente nos locais do Concello de Vigo sitos no edificio Auditorio-Pazo de Congresos Mar de Vigo na Avenida de Beiramar 59, plantas 4ª e 5ª, espazos nos que continuará situada.

O uso destas instalacións pola UNED será gratuíto.

O inmovible conta con:

- Salas para a Administración (despacho coordinadora e recepción).
- Salas para as titorías.
- Biblioteca – Sala de lectura (planta 6ª).
- Sala de Informática.
- Salón de actos.
- Sala AVIP/Videokonferencia.

As actividades da Aula desenvolveranse principalmente na planta 4ª. As aulas da planta 5ª serán compartidas para actividades de interese municipal que se realizarán preferentemente pola mañá, o Concello e a Aula coordinarán a ocupación das aulas para un uso adecuado e eficiente das mesmas.

Así mesmo, a Aula Universitaria de Vigo facilitará o uso do salón de actos para actividades de interese municipal, previa comunicación polo Servizo Municipal de Educación coa suficiente antelación e sempre que non se interfira na actividade propia da Aula.

3.1.2.- Gastos asumidos directamente polo Concello.

O Concello farase cargo dos gastos de mantemento do edificio ou da parte do edificio que se cede gratuitamente á UNED cos fins contidos no presente Convenio (auga, electricidade, limpeza, recollida de residuos sólidos, mantemento de instalacións e equipos, etc.) e dotará tamén a Aula cun servizo de conserxería. Especificamente, o Concello de Vigo asumirá o custo del mobiliario, inmovilizado material (fotocopiadora, ordenadores, mantemento de instalacións e equipos, etc.).

O persoal de apoio ás actividades da Aula UNED en Vigo adaptárase ao horario adecuado para cumprir os fins que coa súa creación se pretenden.

3.1.3. Achega económica do Concello.

O Concello transferirá ao Centro Asociado, en cada un dos exercicios de vixencia do presente convenio, a cantidade necesaria para facer fronte aos gastos incorridos polo Centro Asociado para o funcionamento da Aula de acordo coo estipulado neste Convenio.

A achega económica do Concello ao orzamento do Centro Asociado farase efectiva mediante un pagamento anual.

No momento da sinatura deste convenio esta cantidade está fixada en douscentos vinte e cinco mil euros anuais (225.000 €), con cargo aos créditos da aplicación orzamentaria 3231.489.0000 (Transferencias Titorías e Profesorado da aula UNED) do vixente orzamento municipal, modificable anualmente en función do incremento do IPC.

A tais efectos o Centro Asociado remitirá unha estimación das previsións de gasto antes de procederse á correspondente transferencia. Con carácter xeral, os gastos que xere a Aula non atribuídos explicitamente ao Concello de Vigo nos apartados 3.1.1. e 3.1.2, e que serán compensados polo Concello de Vigo son: compensación de Profesores Titores, actividades de extensión universitaria, cursos de verán (gastos de poñentes, aloxamentos, desprazamentos, manutención e publicidade en medios), UNED Senior, adquisición de material bibliográfico, material de oficina e aqueles outros necesarios que repercutan no funcionamento da Aula.

3.2. OBRIGAS DA UNED.

3.2.1. Actividade da Aula.

Na Aula poderanse titorizar, na medida posible e de acordo cos criterios docentes do Centro Asociado á UNED en Pontevedra, os ensinados do curso de Acceso Directo para Maiores de vinte e cinco anos (CAD), así como os ensinados regulados que se impartan na UNED recollidos no Anexo ao presente Convenio. Ademais dos ensinados mencionados, o Centro Asociado poderá organizar na Aula aquelas actividades culturais e formativas non reguladas que considere convenientes para os alumnos da comarca, de acordo coas directrices xerais aprobadas pola UNED.

3.2.2. Dotación de Profesores-Titores.

A Aula contará co número adecuado de Profesores-Titores que determine o Centro Asociado de acordo coas directrices académico-docentes marcadas pola UNED. Os Profesores-Titores non terán ningunha relación laboral co Concello de Vigo.

3.2.3. Dirección e tutela.

O Centro Asociado adoptará cantas medidas sexan precisas para o exacto e mellor cumprimento do servizo público obxecto deste convenio, informando aos seus órganos competentes e ao Concello de Vigo das innovacións e cambios obxectivamente relevantes e, en todo caso e con carácter previo, das que puidesen supoñer un incremento de gasto respecto do orzamento inicial.

Coa fin de facilitar a xestión académica e administrativa poderá ser designado un Coordinador de Aula e un Colaborador do COIE da mencionada Aula. O Colaborador do COIE da Aula deberá actuar en liña coas directrices marcadas polo COIE do Centro Asociado. Corresponde

ao director do Centro Asociado a facultade de nomear ou cesar ao Coordinador e ao Colaborador do COIE, dando conta do nomeamento ao Concello de Vigo.

3.2.4. Gastos incorridos polo Centro Asociado para o funcionamento da Aula.

El Centro Asociado farase cargo do resto de gastos que xere a Aula non atribuídos explicitamente ao Concello de Vigo nos apartados 3.1.1. e 3.1.2, e que serán compensados polo Concello de Vigo conforme á previsión do punto 3.1.3, a saber: compensación de Profesores Titores, actividades de extensión universitaria, cursos de verán (gastos de poñentes, aloxamentos, desprazamentos, manutención e publicidade en medios), UNED Senior, adquisición de material bibliográfico, material de oficina e aqueles outros necesarios que repercutan no funcionamento da Aula.

3.2.5. Xustificación ao Concello de Vigo dos gastos incorridos polo Centro Asociado.

Como xustificación das achegas dinerarias que en cada exercicio de vixencia do convenio realice o Concello de Vigo e, con independencia do adianto de previsións de gasto a que se refire o apartado 3.1.3 das presentes estipulacións, o Centro Asociado remitiralle, no prazo de tres meses desde a finalización do exercicio, a seguinte documentación:

- Memoria xustificativa na que consten actividades realizadas e os gastos incorridos.
- Xustificantes de pagamento dos ditos gastos, que se acreditarán mediante cheques ou resgardos de transferencias bancarias.

Os gastos subvencionables serán aqueles que sen dúbida respondan á natureza das actividades financiadas e se realicen dentro do período comprendido entre o 1 de xaneiro e o 31 de decembro de vixencia do convenio.

CUARTA. PRAZO DE VIXENCIA DO CONVENIO.

De conformidade co artigo 49 h) 1, da Lei 40/2015, de 1 de outubro, o presente convenio, salvo a súa resolución anticipada por algún dos motivos que nestas estipulacións ou na lei se establecen, terá unha vixencia de catro anos, prorrogable por outros catro anos.

QUINTA. EXTINCIÓN DO CONVENIO E EFECTOS.

Son causas de resolución:

- a) O transcurso do prazo de vixencia do convenio sen terse acordado a súa prórroga.
- b) O acordo unánime de todos os asinantes.
- c) O incumprimento das obrigas e compromisos asumidos por parte de algún dos asinantes.

Neste caso, calquera das partes poderá notificar á parte incumplidora un requirimento para que cumpra nun determinado prazo coas obrigas ou compromisos que se consideran incumplidos. Este requirimento será comunicado ao responsable do mecanismo de seguimento, vixilancia e control da execución do convenio e ás demais partes asinantes.

Se transcorrido o prazo indicado no requirimento persistise o incumprimento, a parte que o dirixiu notificará ás partes asinantes a concorrencia da causa de resolución e se entenderá resolto o convenio. A resolución do convenio por esta causa poderá conlevar a indemnización dos prexuízos causados.

- d) Por decisión xudicial declaratoria da nulidade do convenio.
- e) Por denuncia dalgunha das partes.
- f) Por calquera outra causa distinta das anteriores prevista no convenio ou no ordenamento xurídico.

O cumprimento e a resolución do convenio darán lugar á súa liquidación co obxecto de determinar as obrigas e compromisos de cada unha das partes.

A denuncia do Convenio poderá ser realizada por calquera das partes, debendo ser notificada expresa e fehacemente cun prazo mínimo de tres meses de antelación. Consecuentemente, efectuada a denuncia, ambas as partes seguirán obrigadas a cumprir todos os seus compromisos ata a expiración do dito prazo.

SEXTA. MECANISMO DE SEGUIMENTO E VIXILANCIA DO CONVENIO.

En orde ao seguimento, vixilancia e execución do Convenio, así como dos compromisos das partes que o subscriben, crearase unha Comisión de Seguimento integrada por dúas persoas por cada unha das partes.

Os membros da dita comisión serán: Por parte do Concello, o/a concelleiro/a delegado/a de Educación, que a presidirá, e outra persoa designada por este e, por parte do Consorcio, polo director do Centro Asociado e outra persoa designada pola Xunta Reitora.

A citada Comisión reunirse a proposta de convocatoria de calquera das partes no menor prazo posible dentro dos quince días hábiles seguintes.

Esta Comisión de seguimento resolverá os problemas de interpretación e cumprimento que poidan xurdir na execución das estipulacións acordadas.

En defecto de acordo estarase, no seu caso e sen prexuízo das potestades de disolución, ao que dispoñan os tribunais do contencioso administrativo correspondentes.

SÉTIMA. MODIFICACIÓN DO CONVENIO.

Para a modificación do convenio, incluídas as condicións económicas, requirirase acordo unánime das partes. Esta modificación non suporá en ningún caso a ampliación da súa vixencia á marxe do previsto na estipulación cuarta.

E en proba de conformidade asínase o presente Convenio por duplicado exemplar no lugar e data ao inicio indicados.

A presidenta da Xunta Reitora do
Consortio Universitario do Centro
Asociado á UNED en Pontevedra.

O alcalde-presidente do Concello de
Vigo.

ANEXO AO CONVENIO ENTRE A XUNTA REITORA DO CONSORCIO UNIVERSITARIO DO CENTRO ASOCIADO Á UNED EN PONTEVEDRA E O EXCMO. CONCELLO DE VIGO PARA O MANTEMENTO DA AULA UNIVERSITARIA EXISTENTE EN VIGO.

En Vigo, na data da sinatura dixital.

No momento da sinatura deste convenio, na Aula poderanse titorizar, na medida do posible e dos criterios docentes do Centro, os seguintes ensinos:

ACCESO Á UNIVERSIDADE PARA MAIORES DE 25 Y 45 ANOS

GRAO EN ADMINISTRACIÓN E DIRECCIÓN DE EMPRESAS

GRAO EN DEREITO

GRAO EN PSICOLOXÍA

GRAO EN PEDAGOXÍA

GRAO EN ENXEÑARÍA EN TECNOLOXÍAS DA INFORMACIÓN

GRAO EN CIENCIA POLÍTICA E DA ADMINISTRACIÓN

GRAO EN HISTORIA DA ARTE

GRAO EN XEOGRAFÍA E HISTORIA

GRAO EN EDUCACIÓN SOCIAL

GRAO EN ENXEÑARÍA INFORMÁTICA

GRAO EN ESTUDOS INGLESES: LINGUA, LITERATURA E CULTURA

GRAO EN CIENCIAS AMBIENTAIS

GRAO EN TURISMO

Firmado por: ***4900** MARIA CARMEN SILVA (R: ****00000*)
Cargo: Presidencia
Data: 14/09/2022 10:04

A presidenta da Xunta Reitora do
Consortio Universitario do Centro
Asociado á UNED en Pontevedra.

O alcalde-presidente do Concello de
Vigo.

